



Број/Број: **03/1-50-1-7-53/09**
Сарајево/Sarajevo, 15.6.2010.

ČLANOVIMA ZAJEDNIČKE KOMISIJE ZA ODBRANU I SIGURNOST BOSNE I HERCEGOVINE

Z A P I S N I K

53. sjednice Zajedničke komisije za odbranu i sigurnost BiH Parlamentarne skupštine BiH, održane 15.6.2010., od 10 do 10,45 sati

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Ivo Miro Jović, Vinko Zorić, Selim Bešliagić, Hazim Rančić i Adem Huskić.

Sjednici od članova Zajedničke komisije nisu prisustvovali: Mirko Okolić, Dušanka Majkić, Drago Kalabić i Sulejman Tihić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Boško Šiljegović, parlamentarni vojni povjerenik BiH,
- Muhamed Smajić, Ministarstvo odbrane BiH,
- Mladen Kanlić, Ministarstvo sigurnosti BiH,
- Traver Gudie i Amel Fako, Ambasada SAD-a u BiH,
- Jelena Despot, OHR,
- Jasna Dragičević, Misija OSCE-a u BiH,
- Lejla Hadžihasanović, Štab NATO-a Sarajevo,
- Fatima Miletić, EUPM,
- Nedim Hogić, USAID PSP,
- Željka Domazet, „Glas Srpske“,
- Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH.

Kako nije bilo rasprave o predloženom dnevnom redu, zaključeno je da 52. sjednica Zajedničke komisije za odbranu i sigurnost BiH ima sljedeći

DNEVNI RED

1. Usvajanje Zapisnika 52. sjednice Zajedničke komisije;
2. Razmatranje Prijedloga zakona o dopunama Zakona o službi u Oružanim snagama BiH - prva komisijska faza (predlagač: poslanici Kluba SDA);
3. Razmatranje Informacije o stanju sigurnosti u BiH u 2009. godini (podnosilac: Ministarstvo sigurnosti BiH);
4. Razmatranje Informacije u vezi s aktivnostima na izradi „Pregleda odbrane“ (podnosilac: Ministarstvo odbrane BiH);
5. Tekuća pitanja:
 - a. Poziv na „Strateški vojno-politički seminar“, Sarajevo, PSBiH, od 16. do 18.6.2010.,
 - b. Poziv na „Dijalog o državnim politikama u BiH u oblasti smanjenja rizika od prirodnih nesreća i drugih katastrofa“, Sarajevo, PSBiH, 21. i 22.6.2010.,
 - c. Posjeta predstavnika PSOTC-a, 21.6.2010.,
 - d. Posjeta Komiteta za odbranu i sigurnost Parlamentarne skupštine NATO-a, 23.6.2010.,
 - e. Regionalni seminar RACVIAC-a: „Najbolje prakse i iskustva u radu parlamentarnih komisija za odbranu i sigurnost“, Sarajevo, PSBiH, od 28. do 30.6.2010.

Ad.1. Usvajanje Zapisnika 52. sjednice Zajedničke komisije

Članovi Komisije su bez rasprave, jednoglasno, sa osam glasova „za“, usvojili Zapisnik 52. sjednice Zajedničke komisije za odbranu i sigurnost BiH.

Ad.2. Razmatranje Prijedloga zakona o dopunama Zakona o službi u Oružanim snagama BiH - prva komisijska faza (predlagač: poslanici Kluba SDA)

Branko Zrno napomenuo je da u ovoj fazi Komisija razmatra principe Prijedloga zakona o službi u OSBiH, te konstatirao da je sjednici, u ime predlagača, prisutan Bakir Izetbegović, predsjedavajući Kluba poslanika SDA. Zamolio ga je da članovima Komisije da uvodne napomene u vezi s Prijedlogom zakona.

Bakir Izetbegović naveo je da Prijedlog zakona predstavlja pokušaj rješavanja aktuelnog problema s kojim se OSBiH susreću, uzimajući pritom u obzir tri segmenta:

- da se njegovim usvajanjem ne pravi problem u vezi s napretkom BiH ka euroatlantskim integracijama, držeći do toga da BiH mora u skladu sa standardima NATO-a imati mladu vojsku,
- humanitarni segment, koji se ogleda u zakonskom rješenju da svi pripadnici OSBiH kojima ističu ugovori o službi, a koji su najmanje dvije godine bili učesnici rata, imaju pravo na penzionisanje,
- u OSBiH zapošljavaju se novi mladi vojnici koji su prošli prethodnu obuku.

Pojasnio je da bi usvajanje ovog zakona državu BiH koštalo oko 1.600.000 KM, kojim bi se teretio Budžet institucija BiH predviđen za ovu godinu, a kojim bi se pomoglo finansiranje penzionih fondova entiteta. Svoju raspravu zaključio je činjenicom da bi se usvajanjem ovog zakona riješio veliki problem s kojim se BiH susreće u vezi s otpustom vojnog personala, te pozvao članove Komisije da podrže principe Prijedloga zakona.

Branko Zrno konstatirao je da se niko više od članova Komisije ne javlja za daljnju diskusiju, te zaključujući raspravu naveo da je logično da Komisija u ovoj fazi podrži principe Prijedloga zakona, te da ih proslijedi Predstavničkom domu u daljnju proceduru. Zatim je dao na izjašnjavanje principe Prijedloga zakona.

Odlučivanje u prvoj komisijskoj fazi

Članovi Zajedničke komisije jednoglasno su, sa sedam glasova „za“, podržali Prijedlog zakona o dopunama Zakona o službi u Oružanim snagama BiH, te ga prosljedili u daljnju parlamentarnu proceduru.

Ad.3. Razmatranje Informacije o stanju sigurnosti u BiH u 2009. godini (podnosilac: Ministarstvo sigurnosti BiH)

Branko Zrno podsjetio je da su članovi Komisije uz prvobitni prijedlog Informacije dobili i prezentacije od Ministarstva sigurnosti BiH, kojima se dodatno pojašnjavaju pojedini segmenti Informacije. Naveo je da je sjednici Komisije prisutan i predstavnik Ministarstva sigurnosti BiH, koji može dati odgovore na sve eventualne nejasnoće i pitanja u vezi s Informacijom, te je otvorio raspravu o njoj.

Šefik Džaferović zamolio je predlagača da mu odgovori zašto u Informaciji nema podataka o počinjenim krivičnim djelima protiv života i tijela u BiH u protekloj godini, te da navede da li je broj ubistava u 2009. bio veći ili manji u odnosu na prethodnu godinu.

Selim Bešliagić pohvalio je način na koji se u Informaciji o stanju sigurnosti obrađuje terorizam kao vrlo bitan segment. U Informaciji se nakratko spominje akcija policijskih snaga izvedena u Maoči, kao i praćenje terorističkih grupa s tzv. spiska 45, te je, s tim u vezi, zamolio predstavnika Ministarstva sigurnosti BiH da mu se daju nešto konkretnije informacije u vezi s ove dvije stvari.

Slobodan Šaraba ocijenio je da ova informacija predstavlja značajan napredak u odnosu na one koje su podnošene u proteklom periodu. Naveo je da postoji zabrinutost zbog povećanja stope kriminaliteta u BiH, te zaključio da je ona nastala zbog postojeće ekonomske krize u svijetu. Predstavnika Ministarstva sigurnosti BiH zamolio je da mu odgovori da li je Vijeće ministara BiH uputilo u parlamentarnu proceduru prijedloge zakona navedene u dijelu Informacije koji se odnosi na mjere i radnje u prvih šest mjeseci 2010. godine, te svoju diskusiju zaključio konstatacijom da se ovi prijedlozi zakona moraju što prije naći pred domovima PSBiH kako bi se spriječile daljnje negativne tendencije rasta kriminaliteta u oblastima borbe protiv organiziranog kriminala, zatim borbe protiv zloupotrebe droga, borbe protiv krađe motornih vozila i krijumčarenja lica i trgovine ljudima.

Adem Huskić naveo je da je ostvaren napredak BiH na polju borbe protiv trgovine ljudima, što je potvrdilo nekoliko ključnih međunarodnih organizacija koje djeluju u BiH i State Department, naglašavajući da bh. javnosti treba poslati pozitivnu poruku u vezi s tim, jer se BiH time dodatno približila liberalizaciji viznog režima.

Hazim Rančić pohvalio je, također, rad nadležnih institucija u vezi s pozitivnom ocjenom međunarodne zajednice na polju borbe protiv trgovine ljudima, te pozvao sve druge institucije da, slijedeći ovaj primjer, preduzmu sve potrebne korake kako bi se BiH što prije pridružila euroatlantskim integracijama. Saglasio se s diskusijom Šefika Džaferovića da u Informaciji treba biti ugrađen analitički prikaz krivičnih djela protiv života i tijela. Također je podržao prijedlog Slobodana Šarabe da se prijedlozi zakona navedeni u dijelu Informacije koji se odnosi na mjere i radnje u prvih šest mjeseci 2010. što prije nađu u parlamentarnoj proceduri.

Ivo Miro Jović zaključio je da Informacija ne sadrži kvalitetne podatke u vezi s nošenjem i posjedovanjem vatrenog oružja, navodeći da se stanovnici BiH usljed nerješavanja ovog problemu nalaze u velikoj opasnosti. Ocijenio je simptomatičnom činjenicu da oko 300.000 ljudi u BiH ima odobrenje za nošenje oružja, te naveo da je sporan način na koji oni dobivaju ova odobrenja. Neke procjene govore da se kod građana BiH nalazi oko milion cijevi različitog oružja, te je iz godine u godinu sve veći broj ovih cijevi koje se oduzimaju od lica koja ih nelegalno posjeduju. Dosadašnje analize pokazale su da je oko 70 % upotrebe vatrenog oružja bilo nelegalno, te ga stoga čudi što u mjerama navedenim na kraju Informacije o stanju sigurnosti nije potenciran i ovaj problem.

Mladen Kanlić, predstavnik Ministarstva sigurnosti BiH, kratko je dao odgovore na pitanja postavljena tokom diskusije. Odgovarajući na pitanje Šefika Džaferovića, naveo je da je prethodnih godina često dolazilo do nesporazuma o tome za šta je Ministarstvo sigurnosti BiH stvarno nadležno, a za šta nije. Stoga se u ovogodišnjoj informaciji nalaze samo analize počinjenih krivičnih djela za koje su organi Ministarstva sigurnosti BiH uistinu nadležni, navodeći da krivična djela protiv života i tijela ne ulaze u tu kategoriju. U uvodnom dijelu Informacije navedena je tendencija porasta općeg kriminaliteta. Istaknuo je da je broj ubistava u 2009. smanjen za 10 % u odnosu na 2008. godinu, te naglasio da su sva krivična djela rasvijetljena. Odgovarajući na pitanje Selima Bešlagića, naveo je da se Ministarstvo sigurnosti BiH oglasilo u vezi s ova dva slučaja, ali da sama informacija ne sadrži mnogo detalja o ovome. Naveo je da nije upoznat zašto one nisu razmatrane na sjednici Vijeća ministara BiH, s obzirom da je još prije mjesec dana Ministarstvo sigurnosti BiH uputilo Vijeću ministara BiH informaciju u vezi s tzv. spiskom 45. On je napomenuo da se u dijelu Informacije koji se odnosi na procjenu stanja za prvih šest mjeseci u 2010., koja predstavlja novitet u odnosu na izradu dosadašnjih informacija, može primijetiti da se određene stvari već nalaze u fazi realizacije, a to se u prvom redu odnosi na borbu protiv trgovine ljudima, zatim borbu protiv zloupotrebe opojnih droga, te borbe protiv krađe automobila. Uspjeh na ovim poljima pripisao je zajedničkom radu svih sigurnosnih agencija u BiH. Odgovarajući na navode Slobodana Šarabe, istaknuo je da su u parlamentarnu proceduru već upućeni Zakon o izmjenama i dopunama Zakona o zaštiti tajnih podataka i Prijedlog zakona o izmjenama i dopunama Krivičnog zakona, te da se nada da će zakone o kojima je Slobodan Šaraba govorio Vijeće ministara BiH što prije proslijediti Parlamentarnoj skupštini BiH na usvajanje.

Branko Zrno je, sumirajući dotadašnju raspravu, članovima Zajedničke komisije predložio sljedeće **zaključke**:

- 1) Zajednička komisija za odbranu i sigurnost BiH prima k znanju Informaciju o stanju sigurnosti u BiH u 2009. godini u predloženom sadržaju i formi, te je upućuje u daljnju parlamentarnu proceduru;
- 2) Zadužuje se Vijeće ministara BiH da, s ciljem poboljšanja postojećih zakonskih rješenja, što prije uputi u parlamentarnu proceduru prijedloge zakona navedene u dijelu Informacije koji se odnosi na mjere i radnje u prvih šest mjeseci 2010. godine, a to se, prije svega, odnosi na: Prijedlog zakona o izmjenama i dopunama Zakona o krivičnom postupku, Prijedlog zakona o izmjenama i dopunama Zakona o sprečavanju i suzbijanju zloupotrebe opojnih droga, Prijedlog zakona o izmjenama i dopunama Zakona o graničnoj kontroli, te Prijedlog zakona o izmjenama i dopunama Zakona o Državnoj agenciji za istrage i zaštitu.

Članovi Zajedničke komisije jednoglasno su, sa sedam glasova „za“, usvojili ovaj prijedlog zaključaka, čime je realizirana ova tačka dnevnog reda.

Ad.4. Razmatranje Informacije u vezi s aktivnostima na izradi „Pregleda odbrane“ (podnosilac: Ministarstvo odbrane BiH)

Branko Zrno naveo je da ova informacija predstavlja redovan vid informiranja Zajedničke komisije od Ministarstva odbrane BiH, cijeneći da se radi o trajnim aktivnostima koje se uredno izvršavaju. On se ovom prilikom zahvalio Ministarstvu odbrane BiH na korektnom izvršavanju zadataka u vezi s ovim i predložio da članovi Zajedničke komisije prime k znanju ovu informaciju.

Kako više nije bilo rasprave o ovoj tački, članovi Zajedničke komisije za odbranu i sigurnost BiH primili su k znanju Informaciju u vezi s aktivnostima na izradi „Pregleda odbrane“.

Ad.5. Tekuća pitanja

- a) **Poziv na „Strateški vojno-politički seminar“, Sarajevo, PSBiH, od 16. do 18.6.2010.**

Željko Grubešić, stručni savjetnik, podsjetio je članove Komisije na održavanje „Strateškog vojno-političkog seminara“, koji će, u organizaciji Ministarstva odbrane BiH i Misije OSCE-a u BiH, biti održan od 16. do 18.6.2010. u zgradi PSBiH.

Komisija je odlučila da na ovom seminaru učestvuje Branko Zrno.

- b) **Poziv na „Dijalog o državnim politikama u BiH u oblasti smanjenja rizika od prirodnih nesreća i drugih katastrofa“, Sarajevo, PSBiH, 21. i 22.6.2010.**

Jovica Katić, stručni saradnik u Zajedničkoj komisiji, upoznao je članove Komisije da će Ministarstvo sigurnosti BiH, u saradnji s UNDP-om, 21. i 22.6.2010., u zgradi PSBiH,

održati „Dijalog o državnim politikama u BiH u oblasti smanjenja rizika od prirodnih nesreća i drugih katastrofa“, te naveo da je organizator uputio poziv svim članovima Zajedničke komisije da, u skladu sa svojim obavezama, učestvuju u ovom dijalogu.

Naknadno će biti donesena odluka o članovima Komisije koji će učestvovati u Dijalogu.

c) Posjeta predstavnika PSOTC-a, 21.6.2010.

Željko Grubešić upoznao je članove Komisije da će predstavnici Centra za mirovne operacije u BiH (PSOTC) posjetiti PSBiH, kada će biti upriličena i prezentacija rada Zajedničke komisije za odbranu i sigurnost BiH. Naveo je da bi neko od članova Komisije, u skladu sa svojim obavezama, trebalo da poprati ovu aktivnost, radi razgovora s ovim predstavnicima i odgovora na sva eventualna pitanja koja bi bila upućena članovima Komisije.

Komisija je odlučila da Šefik Džaferović poprati ovu aktivnost.

d) Posjeta Komiteta za odbranu i sigurnost Parlamentarne skupštine NATO-a, 23.6.2010.

Željko Grubešić upoznao je članove Komisije da će Komitet za odbranu i sigurnost Parlamentarne skupštine NATO-a iz Brisela posjetiti BiH. Tom prilikom planirano je da 23.6.2010. održe sastanak i s Kolegijem Komisije za odbranu i sigurnost.

Komisija je odlučila da u ovom sastanku učestvuju: Branko Zrno, Šefik Džaferović i Slobodan Šaraba.

e) Regionalni seminar RACVIAC-a: „Najbolje prakse i iskustva u radu parlamentarnih komisija za odbranu i sigurnost“, Sarajevo, PSBiH, od 28. do 30.6.2010.

Željko Grubešić napomenuo je članove Komisije da će, od 28. do 30.6.2010., u organizaciji RACVIAC-a, biti održan seminar pod nazivom „Najbolje prakse i iskustva u radu parlamentarnih komisija za odbranu i sigurnost“, te podsjetio da su svi članovi Komisije dobili pozive za učešće.

Odlučeno je da će naknadno biti određeni članovi Komisije koji će prisustvovati ovom seminaru.

Sjednica je završena u 10,45 sati.

Zapisnik sačinio

Jovica Katić

Predsjedavajući

Zajedničke komisije

Branko Zrno

Dostavljeno:

- naslovu
- a/a